

**SOALAN NO. 327****PEMBERITAHUAN PERTANYAAN DEWAN RAKYAT**

**PERTANYAAN : BUKAN LISAN**

**DARIPADA : YANG BERHORMAT TUAN SIM TZE TZIN  
[BAYAN BARU]**

**SOALAN :**

**YB Tuan Sim Tze Tzin [Bayan Baru] minta PERDANA MENTERI menyatakan apakah rasional dan pertimbangan apa yang menyebabkan Halaman Bukit Gambir 4 dipindah dari N35 Batu Uban (Parlimen Bayan Baru) ke N34 Paya Trubong (Parlimen Bukit Gelugor), sementara Cangkat Bukit Gambir 1 dan 2 dipindah dari N34 Paya Trubong ke N35 Batu Uban dalam proses belah-bahagi daerah mengundi Mac 2016. Nyatakan jabatan, agensi atau pihak mana yang membuat cadangan tersebut.**

**JAWAPAN:** **YB DATO' SRI AZALINA BINTI OTHMAN SAID,**  
**MENTERI DI JABATAN PERDANA MENTERI.**

Tuan Yang di-Pertua,

Untuk makluman Ahli Yang Berhormat, berdasarkan kepada semakan yang telah dibuat terhadap daftar pemilih sehingga 31 Mac 2017 yang diwartakan pada 20 Jun 2017, kedua-dua kawasan iaitu Halaman Bukit Gambir 4 dan Cangkat Bukit Gambir 1 dan 2 masih kekal berada di dalam bahagian pilihan raya masing-masing tanpa melibatkan sebarang perubahan di mana Halaman Bukit Gambir 4 berada di bawah Bahagian Pilihan Raya Parlimen P.052 Bayan Baru dan Dewan Undangan Negeri (DUN) N.35 Batu Uban manakala Cangkat Bukit Gambir 1 dan 2 berada di bawah Bahagian Pilihan Raya Parlimen P.052 Bukit Gelugor dan DUN N.34 Paya Terubong

Sekian, terima kasih.

328  
**SOALAN ( 328 )**

**PEMBERITAHUAN PERTANYAAN  
DEWAN RAKYAT, PARLIMEN MALAYSIA**

**PERTANYAAN : BERTULIS**

**DARIPADA : YB DATO' SERI MOHAMED AZMIN BIN ALI  
[GOMBAK]**

**SOALAN :**

**YB DATO' SERI MOHAMED AZMIN BIN ALI [GOMBAK] minta PERDANA MENTERI menyatakan berapakah jumlah wang pembayar cukai telah dikeluarkan kerajaan untuk Unit Pengurusan Prestasi dan Pelaksanaan (PEMANDU) bermula penubuhannya pada 2009 sehingga pembubarannya pada 1 Mac 2017.**

**JAWAPAN :-**

Tuan Yang di-Pertua,

Untuk makluman Ahli Yang Berhormat, Unit Pengurusan Prestasi dan Pelaksanaan (PEMANDU) telah ditubuhkan pada tahun 2009 untuk menjadi unit peneraju bagi mewujudkan sistem pengurusan prestasi yang merangkumi petunjuk prestasi utama (KPI) dan menginstitusikan budaya penyelesaian masalah yang sistematik dan efektif dalam perkhidmatan awam. Oleh itu, PEMANDU telah diberikan peruntukan tahunan untuk membantu mentadbir urus perbelanjaan operasi dalam menjayakan pemantauan KPI dan pelaksanaan projek di bawah Program Transformasi Negara (NTP). Hasilnya, pelaksanaan NTP tahun demi tahun telah menunjukkan kejayaan yang memberansangkan, dan telah membawa negara kita semakin hampir kepada tahap negara maju menjelang tahun 2020. Penilaian dan kemajuan NTP secara mendalam boleh dirujuk pada halaman-halaman laporan tahunan terkini yang boleh diperoleh di laman sesawang PEMANDU.

Selari dengan pencapaian NTP, didapati bahawa keupayaan daya saing Perkhidmatan Awam telah meningkat saban tahun. Secara tidak

langsung, kebanyakannya usaha berkenaan pelaksanaan projek NTP kini diterajui pihak kementerian yang terlibat tanpa sokongan penuh dari PEMANDU.

Pada tahun 2017, berdasarkan keupayaan daya saing Perkhidmatan Awam yang semakin meningkat, keputusan telah dibuat untuk membubarkan PEMANDU dan memulakan proses peralihan di mana fungsi PEMANDU akan diterajui oleh Unit Penyampaian Perkhidmatan Awam di bawah pimpinan Ketua Setiausaha Negara.

Sekian, terima kasih.

7 Ogos 2017

**SOALAN ( 329 )****PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : BUKAN LISAN**

**DARIPADA : YB. TUAN NG WEI AIK  
[TANJONG]**

**SOALAN :-**

**YB. Tuan Ng Wei Aik [Tanjong] minta MENTERI KESEJAHTERAAN BANDAR, PERUMAHAN DAN KERAJAAN TEMPATAN menyatakan bilangan skim pembangunan berstrata yang telah ditubuhkan Badan Pengurusan Bersama (JMB) atau Perbadanan Pengurusan (MC) bagi setiap negeri serta bilangan skim yang tidak menubuhkan JMB atau MC bagi setiap negeri yang terlibat.**

## JAWAPAN :-

Tuan Yang di-Pertua,

Untuk makluman Ahli Yang Berhormat, sehingga Disember 2015, daripada keseluruhan **17,625 skim** pembangunan berstrata, sebanyak **3,215 skim** telah menubuhkan Badan Pengurusan Bersama (JMB) dan sebanyak **6,156 skim** telah menubuhkan Perbadanan Pengurusan (MC). Manakala sebanyak **8,254 skim** masih belum menubuhkan JMB/MC. Perincian mengikut negeri adalah seperti berikut:

| Negeri        | Bil. Kawasan Pemajuan | Bil. JMB     | Bil. MC      | Tiada JMB/MC |
|---------------|-----------------------|--------------|--------------|--------------|
| Johor         | 1,241                 | 177          | 250          | 814          |
| Kedah         | 149                   | 24           | 11           | 114          |
| Kelantan      | 34                    | 13           | 6            | 15           |
| Melaka        | 829                   | 52           | 536          | 241          |
| N.Sembilan    | 610                   | 93           | 272          | 245          |
| Pahang        | 199                   | 69           | 60           | 70           |
| Perak         | 296                   | 64           | 156          | 76           |
| Perlis        | 10                    | 4            | 2            | 4            |
| P.Pinang      | 2,189                 | 390          | 797          | 1,002        |
| Selangor      | 6,172                 | 1,441        | 962          | 3,769        |
| Terengganu    | 61                    | 12           | 17           | 32           |
| W.Persekutuan | 5,835                 | 876          | 3,087        | 1,872        |
| <b>Jumlah</b> | <b>17,625</b>         | <b>3,215</b> | <b>6,156</b> | <b>8,254</b> |

Kementerian Kesejahteraan Bandar,  
Perumahan dan Kerajaan Tempatan

Julai 2017